

MATERIAL PA TRAHA PAÑA DI CARNAVAL A BIRA DEMASIADO CARO

ORANJESTAD (AAN) - Segun comentario cu redaccion di DIARIO a ricibi door di un cosedor, material pa traha paña di carnaval a cuminza bira mas caro for di dos aña pasa caba, pero e aña aki particularmente a bira demasiado caro.

No solamente e tela, pero e accesorionan ta obtenibel na

prijsnan exagera. Un pluma cu ainda aña pasa tabata costa 5 Florin awor a bira entre 8 cu 11 Florin. Pa loke ta trata di boton, un so ta costa loke antes nan tabata paga pa un dozen. Y si ta e tela, ni papia mes!

E cosedor ta comenta cu tabata su custumber pa cumpra tur cos y cobra e cliente

pa e trabao completo. Es decir, material, cosemento y diseño. Un paña pa mucha cu antes tabata costa 50 Florin aworaki a bira 150 of 200 Florin, y un disfraz pa adulto pa cual antes nan tabata paga entre 150 cu 200 Florin awor a para bira entre 400 pa 600 Florin y hasta mas. Algun grupo di Carnaval hasta ta ofrece posibilidad pa haci e pago aki den 2 of 3 cuota mensual.

E clientenan a cuminza reclama y pa e motibo ey e cosedor a dicidi di pidi nan cumpra tur e material y e ta limita su mes na cosemento. Ora cu e cliente mes a purba di cumpra tur cos, e mes a ripara con caro esaki a bira.

EFFECTO DI IMPUESTO

E comerciante no por haci otro cu aumenta e prijs pasobra impuesto di importacion riba tela y accesorionan a

subi hopi. Mientras cu gobierno ta papia di "free enterprises" pa beneficia comercio, tog ta clava comericu cu aumento di impuesto, loke no ta cuadra cu e meta di comercio liber.

Segun e cosedor ta señala algun di su clientenan cu ta organiza gruponan di mucha y adulto, a kere cu buscando na Venezuela of Colombia e tela, hilo y accesorionan cu hopi vez nan no ta haya na Aruba at all, nan lo pora a spaar, a hiba e sorpresa grandi cu nan mester a paga un impuesto barbaro ora nan a declara, aparentemente pa motibo di un ley nobo, unda cu esun cu ta trese articulon di afo, maske no ta pa negoshi, mester paga pa tur loke e ta drenta Aruba.

SUGERENCIA

E cosedora kier a sugeri e pa esnan cu ta organiza carnaval, gruponan di comuni-

dad, instancianan di turismo, y tur esnan involvi cu carnaval, pa nan pidi gobierno pa kita impuesto riba tur material cu ta worde usa tanto pa paña como pa carroza, pasobra riba e parti aki tambe tur articulo necesario a aumenta di prijs.

Mientras cu sector Hotelero ta worde directamente beneficia door di mas turista cu ta bini Aruba den e temporada aki, tambe caha di gobierno ta haya beneficio indirecto, door di turismo mes y mas entrada di impuesto. Pero ta ken ta debolbe algo di e gastonan extra, na esnan cu ta esfuerzan mes pa pueblo en general y turismo en particular, disfruta di un bunita carnaval?

E persona y gruponan aki merece di algun incentivo, y lo ta bon pa gobierno sinta pensa un rato cu nan merece cierto facilidad pa inverti den nos carnaval.